

摘藻堂四庫全書薈要

集部

欽定四庫全書薈要卷一萬五千八百二十一

集部

盤洲文集卷七十一

宋 洪适 撰

祝文五十七

台州謁先聖文

昔先聖之門以政事居文學科之右蓋能推惠浹民與
區區搜章雕句者端有間然某綴第詞林進汙羣玉之
府便親露請來貳此邦而初試民政日夜惟念未能深
燭厥理然罄心究精問可省否不敢少負所學効職之

始是申祇告惟先聖鑒之

謁諸廟文

郡丞所以貳守一圻之事實闕掌焉某備數道山私請
得外以來為是邦之佐雖心乎斯民不敢有負而初試
從政大懼莫克逃責佩章之初是用深思控誠以祇見
於祠下惟神尚佑之

造閣告土地文

昔下邳趙興每至官舍必移穿改築故犯妖禁而爵祿

益豐漢史書之某附贅郡貳公宇仍幕寮之舊陋冗巨
居獨東偏有地掌許因芟薙榛莽作小閣焉暇日可以
放目遠覽復廢蔬畦以植雜花而疏池其間以冀縱步
徜徉之適陰陽家或以拘忌為言而延袤無幾不可避
屯取休大懼畚築之非獲戾於上下神祇是敢援趙興
之事以請惟聰鑒其寬貫之

辭先聖文

某未更州縣條章弗之習再歲任職誦所聞不敢念其

私偶逃吏議而去不敢不告

辭諸廟文

某佐州再歲於公無杪忽之補而一身免疾且不以罪
斥得偕婦息問昔塗以歸神之惠我亦私矣更書有期
陳酒拜況

禱蒼山神文

昔王陽不度邛崃九折之阪遂成孝子之名某以父遠
謫亟欲歸侍避天台數驛之迂冒蒼山萬仞之險事與

昔殊心乎其親則同也問塗未幾仍日之雨如注瞻空
默祈賴神之靈屏翳夕休溪殺其漲故朝得以涉進而
止於茲山之麓而雲霧屯晷不見巔岫天光韜而未登
念鳥道蘄絕旁臨邃壑或雨興於上淖艱於下盡室百
有餘指將必有債越之患惟神興哀終此大德

謝禹湖神文

家累千金不垂堂坐國有六職實禁川游故馮河而死
者茲謂輕生而近墻不立者然後知命比浮一葦遽絕

重湖中流而遇風波雖噬臍之無及明神能出雲雨庶
稽顙以能通爰瀆龍顏冀安鯨浪果獲監觀之助遂無
淪溺之虞平昔明心謂魯連之可蹈從今束手與范蠡
以相忘瞻覆轍之在前乘扁舟而知懼非因噎為之廢
食蓋吹葢所以懲羹敢尋前言輒邀靈駕物云不腆効
祭獸之報焉意則無它異操豚而祝者

祈晴文

已下二十七首係代廣帥作

凜秋將半愁霖弗休穡者懷憂居者告病奔走丐貺豈

無明靈惟神之尊大庥此土願借威力一掃陰氛時暘
舒光吏得逭責磬折祠下惟神臨之

謝晴文

下潦上霧積旬弗已民以為戚吏職其憂惟神聰明歆
荅如響鑪烟方布氛噎已清坐致謳吟一變窮慘神功
如此豈望報乎洞酌揭虔以謝靈貺

祭勾芒神文

天子命我盡牧南海之民農人告予將有西疇之事念

銅虎謹班春之職出土牛示嗣歲之期敢恭明神以庇
此土俾曰雨曰暘之若致如梁如茨之收

祭風師文

大塊噫氣扇物功溥入律之初祀事適舉五日應期無
盲無颺

祭南嶽廟文

暮春三月有司率故事並走於群祠惟帝之靈放於四
海粵分實有別宮焉庶幾邀福使瘴癘熄滅雨風節調

民獲寧壹而吏得以救過惟帝其鑒臨之

祭南海神廟廣利王文

諸侯祭其封內名山大川古制也惟神築宮專祠實尸
南海之戚休民之奉事虔不敢怠暮春之吉祀有常典
庶幾邀神之福使瘴癘熄滅雨風節調民以佚居吏得
以抹過惟神其聽之

祭十賢文

惟公咸以抗節之舊流德南紀吏民奉祀久而益虔則

公之所以庥於此土雖千百年猶昔日也春律之季祠以徽福

祭王中令文

某自廣易闢道出曲江謁文獻張公經祠而我外王大父列祀西室蓋公歛惠斯土雖數十百年烝嘗之禮不替某獲分餘蔭而幼失所恃棘風寒泉之思無一日忘也今瞻印像貌愴然有感念瓦缺壁穿丹青彫剝遂以私錢委邑官葺飾因陳牲酒之薦惟公其鑒之

禱南海神廟文

大凡一封之內神受命於天吏受命於君以分幽明之
柄其責等也某材智無長濫受牧民之寄夙夜自厲靡
敢留事今歷三時矣獨是盜賊未能滅心累化蓋此邦
岸大海扁舟出沒易於反掌習俗相煽輕死抵法化之
弗銷而刑之弗懲也是用齋洗露誠乞靈於神惟神之
靈大福此土庶賴威力潛變愚民使之悛悔自新不復
為多櫛大櫂之計山行海宿如出坦塗吏責既逃而神

之更生斯民施則甚博

祭勾芒神文

三載鞭春寧復一牛之愛群心望歲甫興九扈之期徵
於明神監此洞酌願相賣刀之俗益侈求箱之儲

禱南海神文

嶺之東雨暘不時炎涼百變烟嵐四起中之則病故遠
官者以瘴癘為憂某奉藩於此鞅掌簿書夙興暮休不
無勞瘁衝冒之患而盡室數百指起居飲食安能自適

厥中念非明神默相則何以弭災得吉今躬謁祠下是
用私有禱焉庶幾仰借威靈之護使一門長穰無呼醫
問藥之事異時秩滿咸遂安歸則皆神之賜也瀝懇控
誠神其鑒聽

秋祭諸廟文

秋灰斯飛季月琯兮人無札瘥嘿呻嘆兮可以卒歲汗
邪滿兮匪靈之佑曷臻此兮鳴饒拊鼓崇報事兮物云
不腆酒則旨兮春秋蘭菊芳芬繼兮不嘖以笑靈既來

兮永庇我民被去哉兮

禡牙文

維年月日具官以闕

於軍牙之神國家仁民

偃革不用邊亭十載無戰鼓聲有蠢叛黥嘯於章貢憑陵
城郭假息扇凶某把麾東廣實摠師衆皇帝有命發兵
循潮往扞嶺院用固吾圉繕甲磨劍前茅有行典有禡
祭不敢不虔勾神之佑覆其妖巢不煩接刃螳斧自衄
無使逋誅貽恥於神急急如律令

祭南海廟文

昔穰獠嘯凶長驅數郡鋒摩番禺藉神之威不能搖毒
遂繫鐘鼓而斯民免喋血之患綸函寵封以荅陰相嶺
以南戶知之惟神之靈放於四海豈限彼疆此界哉今
章貢叛黥嬰城連三月矣生齒何辜淪胥塗炭天戈雲
集未奏膚公豈神能摧孽獠於前而不能殪魁渠於今
也施明靈以助王師左翦右屠毋俾假息隣封洗兵則
吾之境内益奠枕矣

祭勾芒神文

迓木官之御序告耕耘既飭之期出土偶以揮鞭無穀
棘可憐之狀揭虔邀佑望歲祈豐鑒斯蕝藻之微賜以
餘糧之喜

荅祭颶風文

往歲季秋颶風三作發屋拔木瀕海諸郡皆病之迺季
秋月朔有赤青氣見於東方人指以為颶母越九日乙
未箕伯煽怒濟以疾雨蓬勃之勢張甚惟前事之可慮

也因齋心有禱賴神之力曾不崇朝雨斬風迴害弗及
物漑酒以謝吏其敢後

奉安天王文

在天寶時神能出威靈有功於西域始詔天下策祠高
墉今五羊繕治城堞念像設晻昧是加粉飾及其畢功
漑酒以告惟神永庇我民以扞外侮

春饗諸廟文

春律之杪農事繁興馨鑪漑腸格神乞靈時雨時暘無

災風潦瘴癘消殄五穀既好神其賜之指期以報

禱東廟文

某洊歲牧人賴神之力穀稼胥熟枹鼓稀鳴得以捄過而瘴癘不作民樂其生往者輟鰥孤鳴嘗有禱焉果得陰相姦鉅摧毒大庾以南無遁逃蹂躪之患某今去終更財八旬決說者謂閏歲多瘴敢邀終惠使盡室數百指及期安歸仰瀝丹款惟鑒聽之

立夏東廟祝文

每歲立夏守臣承天子命有事於廟今祝冊及期不至
竊意章貢道梗奉之者或有失墜不敢廢常乏祝躬以
犧幣致告俟冊至當嗣走祠所惟神鑒臨之

秋饗諸廟文

秋箭且盡凡封內血食之祠有司彌祀之所以為民効
西成之報也惟神庥之至於今矣說者謂逢閏必瘡念
茆黃惟時不可不慮敢因報有禱俾無留無害左餐右
粥優游衣褐則神之加惠我民有終矣

奉安南海王文

惟神以聰明正直庇南海之民凡有疾病憂戚靡不奔走邀佑城之南有別宮焉比因繕堞鼎新祠房而像設昏剥遂加崇飾練日之良妥靈薦馨惟神有靈永福斯土

奉安十賢文

予城東北隅有屋數楹列晉唐刺史十人之像皆有清節善政可以矜式後來宜世世血食無愧偶因颶風瓦

飛棟折非甘棠勿翦之意既新雉堞遂葺祠宇飾像設
以吉日具牲酒再拜妥靈惟神視今如昔永庇我民使
踵後塵者無曠職之責則所以報事益虔矣

奉安土地文

惟神有祠於守居之西實司此土而血其食久矣仍年
以來楹桷漏罅風雨不除圖像黝昧弗稱祭薦闕
日吉陳牲酒以告神其臨之

謝船舶風便文

大賈乘巨舸往來蛟龍滄溟之中一瞬千里風稍失便則淪溺破碎不可救非神相之安能布帆無恙今也歸櫓泊步人免魚腹之患而珍寶襍襲所以富國甚腴則報可忘乎酒旨牲碩惟委鑑焉

廣州辭廟文

某脩官番禺行足三禩賴神之佑歲穰盜化使縣薄得逃大何而私室衆累不嬰茆黃草青之疾今天子不以為不材復使治閩問塗有期陳牲酒以謝惟神終惠之

辭南海神文

某司南粵之印自秋涉春者三神職其幽某職其明非
神福之則安能歲登盜革訟希事簡使得逌譴何之域
其私則數百指之累老者康少者遂所謂茆黃草青之
瘴絕不復染今天子不以某菲薄材下復使司東粵之
印戒行有日罄折謝況尚期長途終此陰相

荆門謁先聖文

某誦聖人之書垂四十年游官之日居其半讒巧墮阨

一紀家食始得臨民於一障不敢以遠且小而忽之也
班錄之初敢不祇告

謁廟文

某駑猥無取冒恩典城實與神分幽明之柄其不能撫
摩凋傷而徇已之私神當降之罰至若時雨暘弭疾癘
神不可以不助之也

祈雪文

涉冬少寒天且不雨非時雪以鎮之則開歲必有瀉疫

之患方卜日致祈如已響答固嘗示續紛之兆矣磬折
以禱神其聽之

謝雪文

荆門不見雪距今四歲一禱而三日再白神之為賜大
矣馨鑪漑腸何足言報

祭勾芒神文

推天駟以觀祥不愆舉目出土牛而首事何惜碎身率
屬乞靈為年祈穀願鑒汙邪之祝使歌華黍之詩

祈晴文

雨自暮春至今或歇或作三其月矣農雖得麥而不能
暴蠶出也使腐為飛蛾是與不賜之收等耳神歆此土
其能忍而不恤之耶

祭武安關王文

某結髮讀史固已仰王之忠烈矣玉泉窮山而精爽不
鄙之至於今血食嶽降之日遠邇奔走猶生之年某貧
不擇祿水陸之塗三千里而至此外有官事之責內有

長穉疾病之慮引領企踵而心已馳於彭蠡之陽矣印
綬所絆不得進拜祠下敢具卮酒以薦惟王其右之

徽州謁廟文

某奉天子命易守茲土佩印之三日踵故謁於祠下神
當時其雨暘消除水火盜賊疫癘之事以陰相於上私
而不公神則殛之

麥秋矣雨不止則穉臥而損其收也蠶簇矣日不出則
蛾將飛而繭無以暴也歟歲之後俟來麤以抹而紅女

徒勞將無絲可買也二者垂成神不終惠何以彰廟食之靈也吏聞惟腥可罰可斥而民不可以不畀矜也

謝晴文

某以雨害蠶穀乃甲寅遲明奔走乞晴登車之始雨足未斷謁祠而返人已徹蓋不旋踵清風起於東北掃除重陰化蒸溽而清涼青天白日衆所瞻仰吏則不德何以感召惟神有大威靈曰暘而暘如反覆手卮酒一肉何足拜況

謝雨文

歛在羣山中厥土燥乾水不可瀦六七月之間十日不
雨則閔閔然有無年之憂越五月乙巳雲霓不作禾已
秀亡以趨澤方齋心漑辭將以癸亥拜手祠下乃壬戌
之晝驟雨相仍黎明復有沛然之賜肥瘠霑足人用欣
然神有庥恩何以言報

祈雪文

三冬屢有雪意或雲同而解或霰集而止或雨過而霽
去春不再旬若終無六出之祥則民必有癘疾吏不敢

嘿齋心乞憐惟神其相之

辭廟文

某倉臺旬歲秋毫無補茲蒙誤恩擢之卽位且總軍賦
於京口啟行有期拜況而去

鎮江謁廟文

某從事筆墨心計濶踈猥蒙誤渥督餉京口數道出兵
饋餉艱梗乏興之罪懼不可逃仰祈陰相以濟國事並
職之始敢不告虔

奉安土地文

惟神職茲土舊矣廟宇下窄禱賽弗竭吏卒哀財一新
楹桷偶有土木之役因盡徹旁屋稍遷爽塏得日妥靈
敢薦薄具

辭廟文

某給餉二年偶逃大譴天書橫及俾歸班列具舟將行
拜況於廟

紹興謁文宣王廟文

某罷政還里方省愆咎誤恩遽及來守稽山泣篆之初
敢以敬告

謁諸廟文

某受命守藩涓辰泣篆仰邀陰相敬薦清觴

禱廟文

東儲有疾天子是憂並走靈祠式祈陰相有司奉命即
日投誠願垂擁佑之慈遂迓康寧之福

諸廟祈晴文

閏秋霖雨殆且盈旬矣多稼垂成而壞之豈不重可憂也神之血食於此久矣其忍不救之耶變陰為晴易於反掌奔走乞靈惟神其聽焉

再祈晴文

揆辰虔禱僅逢數日之晴改月連陰復苦半旬之雨天時若此歲事奈何敢逃再瀆之非期救一方之患

謝晴文

七八月之間旱蓋為常歲之憂五六日至於旬連有愁

霖之害嘗控誠禱遂開積陰願終賜於鑒臨俾無傷於
刈穫

辭廟文

越踰年曠官是懼上章引疾拜命奉祠言歸有期
以謝

盤洲文集卷七十一



總校官進士臣胡榮

校對官編修臣周厚轅

謄錄監生臣徐掄元

欽定四庫全書薈要

集部

盤洲文集卷七十四

二至

詳校官助教臣謝登雋



欽定四庫全書薈要卷一萬五千八百二十二

集部

盤洲文集卷七十二

宋 洪适 撰

祭文三十一首

祭錢仲仲文

種學朝夷夕耘羅書數萬比櫛差鱗日游其間寒

芳茹芬發為詞章鳳髓龍筋律古作者刊落腐陳興臺
郊島甲乙淵雲一第恩公逸翮弗振黑頭掛冠瑩莫可
塵結廬巘阿松菊稱賓我辱葭莩寓我桑粉外堂請疑

倒廩傾囷浦思山哀倡玉賡珉公不我鄙再三沐薰春
榭秋畦一笑同醺雄辨劇談舌本津津我官中都別袂
始分公遊天台率歲之春返旆過我繾綣情親我歸江
東歎興參辰聲翼再來新詩逾勤復命未幾哀訃已云
悲哽填膺雨泣繽紛耳言具在手墨方新如何一訣蘭
銷芝然千里飛觴侑以斯文

祭熊承議文

惟公德寓金昭玉溫相佯竹素言涉其津芳芬清埃藉

藉榆粉含徽韜曜非此其身幸哉有子得雋金門贊治
名城擢象夸銀起家甚休榮章逮親文階六進式峻朝
紳循陔自南彼蘭之芬我贅別乘公行丈人承顏一再
談緒相欣天乎嗇年奄忽徂泯枳棘薦肌此情楚辛有
醴既旨有饌既陳魂兮其來是將有聞

祭亡姑文

往者伯祖官會稽姑淪末疾年方笄寧川有兄枳棘棲
藁葬蕭寺久不治猶子監郡行縣時一觴來奠垂涕淚

仲氏使節閩川持歸骨故里終可期魂之來兮其有知

祭董莘伯文

挽髮識面忘形定交寓君梓里尺五誅茅徒步造門握手適郊有唱必和軸脂牛腰女弟擇配占吉鳳爻締好申盟投漆以膠我歸故鄉判袂神臯君官隣郡徘徊賊巢仰事大官心降尻高自我不見霜楓五飄書札方翩忽尋里蒿失我好友撫膺號咷嗚呼哀哉君之嗜學如食而饕君之騁辭軌則風騷植性和粹志操昂霄謂宜

六轡馳騫天朝近不得年美木先凋貌爾孤女無子承
桃夭則不仁直士蒙妖雅雅語言疑疑風標想像平生
剗心以刀嗚呼哀哉隔山河兮迢遙望殯宮兮寂寥酒
欲奠兮弗親魂之去兮來招

祭王侍郎文

遙遙華胄太原之王代有賢牧流芬五羊若琨在齊僧
孺在梁鎮之在宋方慶在唐並載清德如水而霜我公
是似奕葉相望銅虎其符金犀其章雞始鳴矣公坐黃

堂粵俗苟且吏具無網訓狙警鼯束馬轡韉奉牘序進
流汗怖惶遐萌蜚戶狙習獷強繩以周索燭察隱藏滅
心纍化善者相慶夙寇多槩出洲入洋草薶禽獮商有
肖航官府丕變中原之鄉豆區釜鍾一其概量緇黃宣
淫化偶歸良冥漠旅骸相從高岡盲風怪雨昔害今祥
卓然治行赳赳龔黃謂宜賜璽歸鵷鷺行太歲在己豈
事之常仁人必壽寃哉彼蒼某姻連之舊來踵門墻自
公之疾視劑披方同戚賓僚從容諸郎窮夕不寐冀公

小康吁不胙祉弗際扁倉溫溫初言表露肺腸今不聞
矣心焉遇鎔縮酒泄哀魂其來嘗

祭王侍郎文

為大人作

往在政和伯父執憲公締華姻弛擔授館我於是時蓋
傾初面其後尊榮攬轡王畿屈大丈人博奕同嬉公於
是時數會鮮離泊我出疆金陵話別半世來歸公持使
節迎我過我慰藉契濶我謫真陽公休豫章艤楫河壖
閱世炎涼公來問疾不改故常扶胥之鎮控蠻輯蜚帝

私遠人起公來殿孰謂此生握手再見紛紛世道反面
革心交親落甯恨其未深不有君子寂寥義襟兩年相
距道羸十舍水湊陸來憧憧日夜咸曰南伯無如此者
小大斬斬遵矩守童宿姦蒐慝有剗無藏鯨波馘盜鷁
首叢商佛宮沈沈立祠以繪天書當來懼失所賴鬼憎
剛方委魄荒外公昔唁我我今弔公死者丘首生者塗
窮清酒一慟瘴氛改容

為大人祭家叔文

半世漠北聲問中暎王畿再見使節喜持共居里社娛
慰相得永日一枰佳時五白我落炎方君歸自閩謂宜
翔迅尚顯吾門吾門微矣天鍛長翮末疾不起九原永
隔海中一漚今散昔浮惟君了了超然孰儔改轅未期
棺不得撫寓哀陳觴老淚飛雨

祭王侍郎文 為景楊作

臺嶺之南獠蜚襍處漢氏初郡風移椎踞五管今二廣
為天府瀛波拍天大櫓之淵民徂素習聾不可鑄奇貨

銜艘彼貪者泉清朝得人方慶之後象軸錦池褒綸溫
厚我公聞命北面拜手人曰我公盍官中都此瘴癘鄉
非人所居公曰不然異天地乎維舟泝賴輿轎隕嶺即
浮曲江猿狖之境它人怖畏公一不省開府佩章有芾
其橐事紛如蝟窺罅挾藏治如京輔不陋其荒孰為官
非閣法遵例孰為吏非偷墮委靡孰為民非怙強使氣
孰害於教僧有傳匹孰逋於盜囊橐巨室孰弄於市衡
斗不一曾未一年刮剗羣弊耄嬰加額曰見之未野烏

嘯凶昊天降厲嗚呼哀哉某高門自出又奉良姻盛德
未報遠訃忽聞約束行李前輅靈輶慈親生塲夙莫嘗
藥天難是丁志負曩昨撫膺長慟寓此河酌

家叔起靈祭文

竹林就荒今十旬兮升堂開卷聞無聞兮塵留玉塵蔽
蒲茵兮引脰訴天冤告人兮黃墟陰陰宮既新兮翩其
丹旒邈良長兮淚落入尊格歸魂兮

又代叔祭文

靈呈呈兮含幽葉吟吟兮輸愁
芻靈整兮將駕指潛閭兮高丘
蹇難忘兮語言掩韋編兮淚流
酒在尊兮命酌魂其來兮毋遊

又代嫂祭文

嗚呼夫家則叔戚黨惟私嗟悲風之殞燭目六印以無期
聆弱女之嚶嚶泣相對乎孤嫠孤兔將與為隣永不返夫
故棲駐素驂而進酒尚髣髴其中之

又代弟祭文

霜風掠掠吹我高原有寒者鵲銕其長翼茂松之下維
彼靈丘卜云其臧祖載有日寤寐平生叢悲中腸旨酒
是陳靈其歆止

祭趙安人文

惟靈婉婉高門德稱柔嘉作儷宗英采蘋澗涯事請壽
姑蘭獻其葩謂宜秀眉服榮六珈忽兮即冥畫櫬以沙
痛推孝女慈感童牙嗚呼哀哉某等同僚君子好或通
家講聞壺範承訃興嗟沃觴祭幄匪物之華

祭從祖弟景楊文

嗚呼景楊君旅食而枕疾兮不克謁醫而問砭竟委骨
於他邦兮櫬莫憑而視斂復遠葬於異縣兮阻臨穴而
送窆企雙表而寄心兮酸攪腸而中慙我方哭季父於
往秋兮君又遡三泉而奄奄曰吉人必有後兮何斯言
之不驗百年其猶一夢兮君曾不比夫仲欠嗚呼懷君
堅白之辯雄兮與呼盧之氣贍較牙籤之寡多兮證金
根而抱槧儀得縑以底信兮厲白圭使磨玷挹快閣之

夜光兮涉家園之春艷飲我以琉璃之鍾兮琥珀注而
甚釀或泛鷁於蘭汀兮或聞雞於茆店乘小駟而疾馳
兮汗漿流於僮僕我策蹇以殿後兮衣紛披而巾墊躡
羽人之木路兮閔樵夫而席占雜詠諧與嘲諷兮儻顏
間之潏灑已矣乎俯仰皆陳迹兮空盡然而結念惟君
百懷之弗展兮燎方揚而息燄若椅桐未材而枯摧兮
六博中道而墮塹期簡吉以下居兮筮則逆而龜厭遂
齎恨以過隙兮誰適墓而掛劍清淚寫如鉛水兮沃單

孟而反玷

代難老祭景楊文

嗚呼給事之後四子三孫各為單子旁無它昆我也不
天庇叔之尊叔近下世弟復不存何知奇禍萃汝一門
莫莫蓋高誰能叫閤知與不知填悲悼冤弟之秀發自
比璵璠謂宜亢宗視鴻而軒云何折羽不脫丘樊念我
與弟如親在原交歎終鮮倡簫和塤惟仲之春我方北
轅弟出餞我宿郊步園曾不逾時此無來魂仰空一慟

聲不可吞昔謀結廬共依毀垣我歸召匠弟且祭墻圖
未乾墨耳猶在言不廢同築以奉堂萱弟有四男黃口
之鵷經紀分憂俟其冠昏翩翩素旗往潛荒村靈有知
乎來歆此樽

祭朱仲舉文

昔歲入嶺如故於新蘭言可久草味同薰飫我連篇以
玉易珉回車班荆銷南浦魂曾不數月歸全遠聞今我
來思瘴茆再春省念陳迹攪腸受辛嗚呼哀哉濯濯英

韻如孔翠珍白袍者紛勇倍氣吞戰藝京師再屈益振
少寄一弟必驩二親盈才慳壽匪今一人埋志孰從長
吉元賓薄醖寫哀尚何如云

祭梁侍郎文

赫赫東州人士冠冕有塋梁宗鼎鼎通顯自我宋興接
武鳴珂幾人雁塔三冠甲科再世秉鈞前叅後何人門
之懿藉甚薦紳高山喬嶽枿杞盤根淑氣所鍾代有偉
人惟公之英相臣之子早據要津聲落人耳龍飛白水

遂執羈勒密依日月康侯畫錫時方外
詎俾鎮方面鳴義蟬結剗礪丕變帝念久外
俾還中都少貳夏官將柄斗樞忽嬰沈疴退卧漳濱
十年問鑒養氣頤神駟訃忽馳孰不驚聞嗚呼哀哉
惟公蘭玉策翰墨勲久矣定交寅緣登門杯酒通家情
同懿親曾不披霧負愧心曲寓文漬酒恨此蹉跎

祭從兄難老文

嗚呼自我還鄉同兄之居朝言夕語緡弄琴書暇時杯

酒奕博投壺雜以笑謔朋友之如自兄它徙恨不數見
相過必款不忍背面兄既卜築仍復隣牆日贊鳩僦彼
棟此梁曰有蠟梅封之後堂朱欄雕砌自以翰香有舞
有歌樂未渠央我來炎方餞我雙港轡北帆南別愁分
兩方春之季得冬日書盈紙諄諄詢我歸與曾不旬浹
計音忽至校得書時兄已下世天胡不仁天此良器卉
衣孔單不能漬淚嗚呼哀哉自大王父遂分兩支夕拜
之後別駕繡衣繡衣父子繼踵九泉別駕早殞兄又不

延三房孤嫠衰經慘同行道感傷有此灾凶惟我連蹇
官心已灰謂其接屋杖屨之陪羣從彫落孰相往來逝
者之憾存者之哀數千里隔參辰則近病不問狀斂不
撫櫬銜此酸辛痛如受刃流聞卜兆石潭之陽尚期遄
歸以送窆藏嗟嗟難兄人琴俱忘

祭鄧提舉妻恭人文

稟生高門林下之秀鳴鳳其昌移天協繇承姑竭孝紛
悅夙興春秋廟祀藻絜繁馨恭上接下間言斯寢淑行

柔性宗姻所稔邑開湯沐榮對魚軒謂宜鶴髮壽考百
年嵐熏霧染遂嬰沈痼疋劑弗良奄至大故嗚呼哀哉
某寅緣宦侶通家結驩妻孥相從如至親然自聞整裝
方惜遠別忽焉降厲填此悲咽酒旨于觴食豐于豆再
拜靈幃文以為侑

祭呂教授母夫人文

生於高族作嬪儒門禮虔巾櫛職謹蘋蘩稱蘭比行有
淑其德里社姻連指為壺則擇隣誨子露穎祠林望我

幕府情好方深遂悲棘風奪其慈母式陳一觴莫盡悽
楚

衆官祭鄧恭人文

猗與夫人名儒之後典訓克閑女德之茂作儷君子見
謂宜家言采其藻居約去奢事姑如母逮下以慈鍾禮
郝法克兼有之恭侔舉按賢過斷織顯顯壺羹聞者仰
則載榮鸞誥未啟國封天不與齡豈數之窮嗚呼哀哉
某等借潤使臺並列賓案獲聞懿範如古所載忽傳僚

幽悼興於心羅饌縮酒尚其來歆

路祭呂母文

嗚呼夫人有子未冠名馳須次芹水攝空蓮池論議卓
詭文采陸離金蘭耐久情比墳簾以子之賢知其母儀
髮髮既剪枯圈已非吉士嬰罰僚朋集悲汎彼行舟次
河之麋素旗翩翩遠哉其歸取醴以載庶幾中之

同寮祭呂母文

早服圖史之訓克恭蘋藻之職鄉閭範其禮法宗族稱

其慈和金社流光芝玉相映及見其長策勲詞壇正伸
三釜之養遽起蓼莪之悲某等定交賢息並遊蓮府登
堂之拜未遂就木之訃已聞漬酒素幃悲不能止

路祭鄧恭人文

質蕙兮行蘭禮容兮德言儵忽兮僚幽怨天兮新年作
嬪兮君子三歲兮使還端著兮探策日吉兮時涓靈衣
兮塵翳總帳兮素筵美櫝兮問途寄舟兮江干薤歌兮
鏘挽飛旒兮翩翩薦誠兮有輶莫盡兮悲酸

衆官路祭鄧恭人文

風吹空兮寂寥幽雲屯兮秋之朝睇前止兮霧擁搖敗
黃兮瘴茆悲夫人兮四德俱卜嘉耦兮名儒湯沐兮石
窳榮華兮軒魚忽積痾兮弗痊惜不遭兮吏跼聞靈氛
兮辰良橫主舟兮江隅挽丹旒兮再拜頌薄醲兮生芻

祭羅權郡文

惟君有充然之學而發為絢然之文有粹然之德而見
諸隱然之仁色不形於愠喜交無間於故新研吏牘之

靡密究下情而諄諄故人皆知其為媿德君子而政見
稱於遠方齊民惟平生之蹈景幸逾年之同寅偶旁郡
之闕守擇賢者而拊循當問途之話別見君意之悲辛
謂金蘭之分篤廼黯黯於臨分何期嬰此沈痼鬲生死
於斯辰驚訃音之聞耳屑哀涕之紛紛竟絆驥而弗展
鍛風翩於乘雲望靈輶之戾止寓哀悰於一尊

衆官祭羅通判文

惟公瑩牕種學足用三冬泚筆成文有作者風登名鴈

塔騰譽儒林牛刀小試卓魯銷聲遂駕屏星益崇厥稱
遠佐南海人仰盛德究心吏治何枉不直攝麾新昌少
借循良遐萌相欣召父南陽仁者必壽孰詢彼蒼嗚呼
哀哉某等或以游官同君子寮或以道義結金石交彌
年相從見謂傾蓋河梁銜杯黯然于邁期以數月拏舟
相尋鵬集承塵遂聆訃音失此吉人誰不悽惻泄哀斯
文有淚盈帛

祭韓權郡文

嗟嗟少汲韜負軼才學耕文獲續美中台人避劇煩君
曰我願蚤飲外臺聲埃滯顯題治中興絆驥未展攝麾
端溪治如畿甸燭抉隱藏貪悞股弁慈父蜚謠吏具丕
變暫臨恩平飲惠胥賀天不仁遠子服兆旣昔者桂林
實始識君相示肺肝似蘭斯薰謂宜振翮乘凌高雲齋
志盛年訃駭初聞厚終恤孤矢心古人斗酒則菲攪酸
莫云

衆官祭韓權郡文

惟公有逾人之才見施於為政有汲古之學見許於倫
等器利盤錯牛無肯綮銖兩藏奸免不可幸民手額而
感惠吏重足而遷行故康恩兩州之治獨寡二於五領
問千里之長途庶齧鄰之一騁嗟秀木之摧風遡泉臺
之夕景嗚呼哀哉某等金蘭心叶膠漆情親懷話言於
疇曩狎杯酒之殷勤昔公之別渌波粼粼今以柩來瘞
茆復春棲淚目曉文不概悲再拜一酹公其中之

墓祭韓權郡文

儒采兮雅言分縈兮彌年彼蒼兮殲良芝然兮蕙歎瞻
召父兮杜母有善政兮差肩揚芳兮耀遠傳循吏兮不
刊朱明兮換律瘴草兮荒烟寄遺骨兮南紀俟後人兮
謀遷想平生兮淒哽漬薄酒兮潛然

又同寮祭文

嗚呼尺波電謝今昔同悲嗟我吉人而止於斯遺愛在
民棠蒂四郡較德松銘方來傳信有夜者臺有潛者隧
埋玉南荒執友攬涕魂兮歸來歆此一醕

盤洲文集卷七十二

欽定四庫全書薈要卷一萬五千八百二十三

集部

盤洲文集卷七十三

宋 洪适 撰

祭文三十四

路祭胡提舶母文

商飈急兮飛塵榕陰陰兮晝昏寒泉之思兮孝子飛旒
啟兮悲哉夫人惟夫人兮以子貴疊紫誥兮鸞迴厥紙
使節煌煌兮甘旨鶴髮壽眉兮含飴受祉忽嬰疾兮天
降厲問瓊茆兮既辰棹檣兮江湄喝松霧兮楚挽陳薄

酌兮悲辛

衆官路祭文

惟靈訓服圖史職共蘋蘩媿德君子禮法之閑篤生時
英乘使者車雞鳴問安有榮板輿龐眉黃髮人仰壽母
忽兮染痾悲哉題湊秋云暮矣淒其以風靈輒呵塗指
舟之中再拜一輶瘴氛變容

祭梁尚書文

惟公有剗繁理劇之才而彰於盤錯有裕國富民之術

而見諸施為主計文昌錢流地上摘伏京兆道不拾遺
出殿价藩章章善績天奪懿德朝露易晞嗚呼哀哉某
諾仕之初得窺察猥叨賞接軫其匱窮契闊東西白
頭如故未展毫芒之報驚聞彫落之音飛淚薦誠文不
泄意

祭陳安撫父文

惟公隱曜含和里評冠月季祉賢嗣詩禮飽聞拾芥巍
科颶聲榮路皇華方伯鼎貴未央告弟出綸屢榮潛隧

某效官東治雙表是經鄉之吉人遐想高躅況官侶之
好情篤鯉庭豈隻雞之詞不如昔者磬折以薦靈其格
思

祭黃提刑父文

惟公德比玉溫鏟采家食挺生哲嗣允蹈義方高折蟾
枝飛聲烏府三持使節仁匝炎州密印之榮衮衮未艾
其效官東粵道邇佳城鄉之儒先欽想遺範矧鯉庭篤
嘗察之好豈雞酒嘿前人之詞薦此寸誠恨不躬酌

代祭張右相母夫人文

卓哉夫人天稟淑姿紛悅竭孝圖史鳴徽婉德名門郝
法鍾禮言采其蘋湘之釜錡篤生真儒為天下霖忠高
洗日望藹捫參義方有訓幼與擇鄰訢訢相中茲惟嚴
君丞相在朝夫人西來皇帝異恩以駟騎催帝謂吾相
思奉板輿郵籤奏邸日報起居為母之榮瞻前寡二鸞
誥疊封貂冠虞侍燕及孫曾芝玉競秀黃髮有詩如魯
壽母萱凋夜色蘭罷晨馨天乎禍集聞者涕零素旗搖

搖在湘之陰一東生芻千里馳心

祭程參政文

番水湑湑番山嵬嵬偉人輩出未光三台英英我公天
荒始開五行一覽七略兼該筆精墨妙穿月掀雷發名
首科垂斗之魁咫尺顏前席仕無良媒高驤夷路汗路駕
駘迺立螭坳帝墳以裁迺上左掖比綸大哉迺侍經幃
蘊挾秦灰迺拜夕闥疏入天回迺啟北扉塲花聽槐迺
幹樞機廟謨是陪身退甚勇夸綉畫來婆娑家林如綠

野裴歲在淵獻道變九垓天子改絃注想實材再三辭
疾札書日催入參揆路妙運陶坏沛乎魚壑匪夕鹽梅
士期棟隆博求楔根人期儒效布武熙臺云胡不愁美
疾行災讖占子服厲過黃能嗚呼哀哉某等旅進詞壇
皆下下才拔三得二指珉作瑰綢繆光接且輓且推永
懷評目有覲恩鰥哀哀吾州耆舊凋摧又失鉅公泰山
之頽訃驚遠邇謠輟提孩德容永鬲芳躅塵埃饌登于
俎醴陳于罍一慟三詫辭不盡哀

祭熊運使文

嗚呼天有間氣上為列星攬其光芒人以文鳴濯濯我
公番川之英手翻五車撐柱腸膺名泓進穎散綺敷瓊
旁觀辟易三嘆同聲迺游木天迺儀冰廳雅宜為誥以
續六經孰不拭眚看公鼓行彼柄國者濁亂渭涇廟薦
康瓠周鼎非馨卷其黼黻光迸山扃雞羣退步鵠侶尋
盟雕鏤月露鞭逐風霆能人紀事孝子求銘作八分字
走四裔名荒涼愚溪呼柳不謦申弔湘纍專鄂之城才

高數蹇參恨千齡藥傷蘇枯春在雙旌
眊歌于途聞者耳盈三綬若若封提舊
京謂趨嚴召為公為卿恭惟鄉耄扶翼
後生飫以鼎臠私其旦評牽絲遠來密
倚澄清遽聞駟訃淚墮心驚輝沈詞伯
來者孰程短章大篇歸之六丁滔滔漢
水旄舉舟輕三尺所閱一觴莫傾抽哀
淮札式寓寸誠

祭方金壇文

嗚呼五羊襟期首末四年清尊列舞短
韻大篇無歡不

同無句不聯非疾非夕不相棄捐情無猜隱如兄弟然
分攜八載小牘翩翩開春季月我宦畿內聞君旅食搖
心晤對我方入郢君已言邁君知我來停舟返旆欣然
一見歲寒不改我冗君還悵不款會曾未再旬而棺已
蓋終天遂訣承顏弗再嗚呼哀哉君有家學得之青箱
君有遠識論議軒昂區剖萬事語塞在旁胷中涇渭餘
子參商平生友愛追隨鴈行連佐幕府不游異方盤根
未試銛鋒匱藏元昆換節君必階歸仕以此淹校考頓

遲年過四十小選甫離得邑句金牛刀割雞裴回一壺
尚遠瓜時天忽降戾疾不可醫我亦骯髒同盟者希失
此莫逆有過誰規驤首總帳曷日循題飛文矢哀淚若
綆縻持薦卮酒君其中之

祭鎮江都統張少保文

嗚呼邊庭構釁燃臍自亡孰乘此機恢我故疆公提將
符慷慨誓衆韜略家傳膽有餘勇胸山之圍敵騎雲集
疾馳援兵蒙犯暑濕大伊覘虛石礮奪險神助積雨霑

者為塹鑿城之北如風掃葉還寧寘渠人畜相躡追奔
皋橋振旅舊屯不增鹵獲咸以實聞踰淮治堡回歸縵
屬假之歲月犁庭可卜得疾馬上遂在膏肓將星夜隕
誰不悲傷我總軍須周旋連月促膝高談壯懷激烈望
公藥喜何期永訣漬酒弔廬攬涕如屑

祭王樞密文

惟公挺挺英標鄱川之望穹木千尋擢秀青嶂洞然曾
宇議論宏放高騫月窟為諸儒倡入判五花辭推指匠

出護坤維願指百將再來禁瑣帝呼輩行印綬若若挾
三牽兩遂登籌幄日吐忠謹沛乎縱壑倚以為相黃能
作厲遡魄潛壤宸衷震悼一鑑淪喪嗚呼哀哉某夙講
清塵近接鄉鄙宦路背馳參辰迥仰代置掌制晚依翰
長賓堦屢登契越疇曩問疾半旬宛其長往敬酌一觴
莫展悲愴

衆從官祭王樞密文

惟公道苞墳索材冠倫魁軒然儀表籍甚清埃頃入帝

城奮跡麟臺東掖西垣燕許大才夢刀作牧馭叱邱峽
千齡胥契一節復來禮文野絕議論天回起草玉堂號
令風雷榮陟宥地光並三台碩畫嘉謨丹宸虛懷倚以
柄國舟楫鹽梅忽嬰沈痼梁壤山頽某等武接夔龍談
笑屢陪洞見肝鬲中無疑猜半旬不面逝水傷哉饌潔
于俎酒登于壘瞻樞一慟文不寫哀

祖廟焚黃祭文

某人品凡下無所取材蒙被德蔭浸叨兩地始入西樞

得以卹典追賁祖廟某印組所拘無因躬至松楸之下
謹以太子太傅黃告一通俾弟某上冢以告伏望垂光
委祉益燾其後

禰廟焚黃祭文

某材智駑劣無以過人蒙被慈訓叨竊儒科入朝僥倖
浸躋膺仕三釜不伸每深痛慕始入翰苑繼擢宥庭皆
有密章增飾禰廟某印執所縻不獲躬至松楸之下謹
以少師太師黃告二通俾弟某上冢以告

白茆焚黃祭文

其幼被慈教致叨儒科入朝踰年遂躡兩地季夏之月
以階遷中奉繼有北門西府之除再旬之內三進國封
恩渥重仍增貢幽壤重惟菽水之養莫報劬勞想象音
容罔極增痛雖松楸不遠而繫官有守不得詣前謹以
慶國魏國楚國夫人黃告三通遣男桴上冢以告

白茆焚黃文

其典樞輔政方懼滿盈復拜誤恩遂躋相位顧惟非據

實自慈訓祿養不伸罔極增痛聖代渥典洵賜卹章大
國舊封益上新澤繫官有守展慕無階

彬州焚黃文

某資稟凡庸無足比數遠藉慈蔭浸竊官榮掌樞秉鈞
再膺卹典顧瞻松楸邈在他邦有子有孫弱不可遣展
掃弗虔有負顯報

家廟祭考妣文

澹津之址基我先君南遷不返齋恨泉下布椽治礎遺

訓在耳歷載二十始遂肯堂之志會有稽山之命不克
俟落成而去家廟居中寶存手澤敬惟鑒佑孫曾保之
家廟祭祖考文

某罷政還鄉始獲卜築以遂先志誤恩遽及懷會稽之
章就道有日不克俟落成而去新此楹礎永薦觚鼎敬
惟鑒知益燾其後

家廟告高曾祭文

澹津之基發自慈訓前歲歸里始獲肯堂斤斧未休往

鎮禹會勺祠得請茲克奠居家廟處中式報遺蔭永期
燕妥益燾後人

故縣焚黃文

某頃叨秉鈞朝廷推教忠之澤以光禰廟始荒邾子之
國去夏邁階遷中奉復進淇奧之封暨逢郊禋遂徙大
名之壤仰惟盛德燾後卹典便蕃而風木纏悲罔極何
報茲因冬朔併舉黃告三通燎於墓下

滄潭焚黃文

其往歲當軸去冬遇郊再霑恩榮以顯祖武故祖考自
亞傳而冠三孤祖妣自莒國而進衛國茲因展墓謹以
黃告四通燎于祠下

金山焚黃文

某以庸常之材昨流光之慶往年當國再有卹典以資
泉隧還鄉未幾迫於守越故三少之命未及燎黃茲因
冬祭敢告於墓下仰惟明靈鑒此褒章

辛卯滄潭焚黃文

同景嚴

國家恩厚輔弼雖去位遇郊猶得崇報於祖廟某等憑藉德蔭饗此官榮雙奉卹章獲伸繩武之孝祖考繇帝保而躋帝傳祖妣則有大國之封冬朔掃冢敬以黃告三通焚于墓下惟靈其鑒之

故縣焚黃文

某憑藉德澤奉祠佚居遇此郊裡慶延兩世惟我顯考位極帝師雖封國尚有秦壤而怨家之姓也不欲以汚栗主之神故仍用舊邦復受新渥維冬之朔敬焚黃告

仰惟明靈其鑒之

白茆焚黃祭文

恭惟母氏裂全魏之封今九年矣其霑被慈蔭兩以郊
霈俱仍舊國再開新渥身滯遠鄉既不得展掃丘壠而
燎燔黃告又不以時茲因男桴赴調入浙始得白於墓
下泚筆投淚惟靈其鑒之

祭余文特文

惟君粹然之質盎然之和結交四海白圭不磨少年逸

氣已凌虹霓仕路連蹇晚得一麾彼蒼者天何者尼之
甫出都城即以疾歸一室八年藥裹不離我治盤洲君
好苔竹蒼頭手輿花下追逐蹒跚學步指擬亭復水閣
一觴月亭一曲投醪耐久惟日不足信宿不面已飛子
服情話盟寒佳城遂卜感傷陳迹淚若驚瀑

祭樞弟文

嗚呼親則手足義則友朋少小同志刻苦牕螢聯中科
目闊步蓬瀛繼踵詞禁遂陟樞衡自昔監郡始相契闊

三十年中少會多別細數從容七十其月園池相望苔
竹蒙密對酒賦詩曾無虛日建康之歸恨君有疾日望
藥喜杖策可必天乎不仁鵬鳥入室鐺脚情話今折其
一悲苦填膺傷感陳迹酌此一觴淚若泉出

樞弟周祥祭文

嗚呼終天之訣於今旬歲想象平生屢飛清淚風梗鵠
原暮景憔悴傾此一觴悲在心髓

樞弟大葬祭文

嗚呼生死之隔忽其三年追思友愛陳迹依然松檜成
列日迫新阡靈輅將啟丹旌翩翩隕淚漬酒痛橫九原
祭萊國葬事文

嗚呼幽明路隔倏其三年尚想往昔鰥魚自憐羅列蜀
靈將捐松阡攀車一酹淚如流泉

諸子

鴈鳩均一大哉母道棘心天天劬勞曷報日月交馳三
食新稻泣血一觴魂飛宅兆

盤洲文集卷七十三

欽定四庫全書薈要卷一萬五千八百二十三

集部

盤洲文集卷七十四

宋 洪适 撰

行狀一

先君述

先君諱某字光弼饒州人曾祖諱某祖諱某贈中大夫
皇考諱某通直郎贈右大中大夫妣太碩人董氏先君
登政和五年進士第主台州寧海簿會令去攝其事民
舊苦市絹不均先君始令物力百千者賦一匹大姓王

隆多買田不受稅歲纔五十匹至是數增三倍餘以次
定賦蠲貧弱者四千八百戶李氏富而戇家藏妖書號
二宗三際經時節集鄰曲釀香火祀神元未嘗習也姦
人詭入伍中通其女既泄即告縣逮送獄先君入食有
小吏偶語喜甚詰之曰李氏輩賂錢五十萬故喜先君
曰是下獄屬耳而賕吏若此可緩乎即呼囚庭下委曲
問情得枉告者平決之吏駭顧失色方臘反台之仙居
民應之蹤捕反黨及旁縣一日驅菜食者數百人至縣

丞尉皆曰可殺先君爭不得丞尉用賞秩不踰年相繼
死皆見所殺為厲云拜南京國子博士未上賊犯杭州
經制使陳公亨伯檄主餉奏功遷宣教郎為秀州司錄
事宣和六年秋大水田不沒者什一流冗塞路倉府空
虛無賑拯策先君白郡守以荒政自任悉籍境內粟留
一年食發其餘糶於城之四隅外損市直錢五戒米肆
揭賈於青白旗上巡行無時扶其旗靡者皆無敢貴糶
不能自食者官主之立屋於東南兩廢寺十人一室男

女異處防其殺偽涅黑字識其手東五之南三之負繫
樵汲有職民羸不可杖有侵牟鬪囂者亂其手文逐之
皆帖帖畏服借用所掌發運名錢錢且盡會浙東綱常
平米斛四萬過城下先君遣吏鑱津柵諭守使截留守
噤不肯曰此御筆所起也罪死不赦先君曰民仰哺當
至麥今臘猶未盡中道而止則如勿抹寧以一身易十
萬人命訖留之居亡何廉訪使者王孝竭至郡曰平江
哀號訴饑者旁午此獨無有何也守具以對即延先君

如兩寺驗視民肅然無出聲孝竭曰吾嘗行邊軍政不
過是也違制抵罪得為君脫之且厚賞呼吏草奏先君
曰免戾幸矣安所賞但食猶未足公能終惠復得二萬
石乃可孝竭以聞米如請而得至麥秋民相攜以歸前
後所活九萬五千餘人州人既不死凶年先君出無不
手加額呼為洪佛子累官朝散郎丁大中憂還鄉奔喪
太碩人年七十矣與弱孫在秀諸卒以城叛鹵掠無一
家免過門皆曰此洪佛子家也毋得入賊平先君還過

臨安時苗傅劉正彥出逃未伏誅上將遷狩建康先君
上疏言今內難甫平外敵方熾若輕至建康恐金人乘
虛侵軼宜遣近臣先往經營庶事告辦鳴鑾未晚也時
廟謨已定不能從既而悔之上問宰輔近諫移蹕者為
誰今安在丞相張和公時知樞密院以對過秀邀先君
至平江欲以為部使者招二凶適捷書至乃止將辭歸
和公曰呂丞相欲見君即遣直吏介謁俄有旨召見時
方墨衰經丞相脫巾服衣之既對上以國步艱難兩宮

遠狩為憂先君極言天道好還北人安能久陵中夏此
正春秋邲郢之役天其或者警晉訓楚也所言反復當
上意上曰卿議論縱橫熟於史傳有專對之才朕方擇
使無以易卿先君以母老父喪懇辭不許擢徽猷閣待
制遷五官假禮部尚書為奉使大金軍前使令與宰執
議國書先君欲有所易輔臣獲其文不喜遂抑遷官告
一日歸別先君持太碩人拜且泣時長子适甫十三歲
逃以下皆襁褓呱呱省別行路不能仰視先君弗子也

淮甸賊蜂起兼淮南京東等路撫諭使俾李成以兵護
至南京成乃方與耿堅圍楚州以責其降金為名實持
叛心先君遣書抵成成曰汴泗虹有紅巾非五千騎不
可往軍食絕不克唯命先君聞堅可撼陰遣說之曰君
越數千里赴國家急山陽縱有罪當稟于朝今擅兵攻
圍名勤王實作賊爾堅意動遂強成斂兵先君行未至
泗境諜云有迎騎介而來副龔璫曰事叵測虎口詎可
入送兵亦不肯前先君不得已遂返即上疏言李成以

朝廷不撫卹稽軍饗有引衆納命建康之語今靳賽據揚州薛慶據高郵萬一三叛連衡何以待之方含垢養晦之時宜選辯士諭意優進官秩畀以京口綱運如晉明帝待王敦可也疏奏上遣閤門宣贊舍人賀子儀撫諭成給米五萬石令第將士名貶恩初先君戒所遣吏須疏從中出乃詣政事堂白副封時方禁直達忤宰臣意以託事滯留降承議郎許出滁陽路張守忠李貴嘯穎上道益梗提舉官范渙張銳嘗招慰之旋復亂先君

至順昌間賊有至近郊以牛驢市物者約與相見譙門
下先君曉譬切至曰自古無白頭賊賊竦寤請歸報其
渠迺為書至其窟穴守忠貴聽命率所領入宿衛守忠
初名俊入朝賜今名李貴即俗所謂李閻羅者先君間
關至太原留幾一年金遇使人禮益削及至雲中大帥
尼堪迫遣與副使官偽齊先君曰萬里銜命不得御兩
宮以歸大國度不足以有中原當還諸本朝迺違天以
奉逆豫豫可憐萬段顧力不能忍事之耶今留亦死不

即豫亦死偷生狗鼠間甘鼎鑊不悔也尼堪怒命壯士擁以下執劒夾承之先君不為動旁貴人喈曰此真忠臣也止劒士以目為踞請尼堪怒少霽遂流遞于冷山與假吏沈珍隸卒丘德黨趙張福柯辛俱副使至汴受豫命知恩州流遞猶中國編竄也雲中至冷山行兩月程距金二百餘里地苦寒四月草始生八月而雪土廬不滿百皆陳王烏舍聚落烏舍使誨其八子或一年不給衣食盛夏至衣犂布番課四隸採薪它山嘗久雪薪

盡至乞馬矢煨麵而食紹興二年使者王公倫歸為上
言之即下秀州存問家屬賜銀絹二百疋未冠得監南
嶽廟先君辱於北庭十年多為詩文以諷皆憂國傷時
語烏舍嘗得獻取蜀策持以問先君先君歷陳古事梗
之烏舍銳欲吞中國曰孰謂海大我力可乾但不能使
天地相拍爾先君曰兵猶火也弗戢將自焚自古豈有
四十年用兵不止者又數數為言所以來為兩國文事
今既不受使迺令深入教小兒兵交使在禮不當執烏

舍或應或否一日大怒曰汝作和事官却口硬謂我不
能殺汝耶先君曰自分當死顧大國無受殺行人之名
此去蓮花樂三十里使之乘舟一人蕩諸水以墜淵為
言可也烏舍義而止兩宮蒙塵五國城嘗遣私人奏書
并獻胡桃梨脩粟麵諸物兩宮始知趙氏中興永祐陵
諱聞先君北鄉泣血旦夕臨後遇諱日即燕山開泰寺
為文以薦其畧曰故宫為禾黍改館徒饋於秦牢新廟
游衣冠招魂但歌於楚些雖置河東之賦莫止江南之

哀遺民失望而痛心孤臣久繫惟嘔血又云盛德之祀傳百世以無窮在天之靈繼三后而不朽故臣讀之無不掩涕金已遣使約和烏舍問所議十事先君條析之甚至曰封冊是虛名年號本朝自有金三千兩景德所無東北宜絲蠶大國有其地矣絹不可增也至於取淮北人徭民害計本朝必不可景德之盟南北所得人皆不取載書猶在可覆視也烏舍曰吾固欲取投附人誅之以懲後何為不可先君曰昔魏侯景舉十三州地歸

梁梁武帝欲以易其姪蕭明於魏景遂作亂陷臺城仆
兩帝中國所監決不相從烏舍稍悟乃曰汝性直所言
不誑我吾與汝如燕遣汝歸議遂行所存沈珍丘德黨
超三人既而莫公將北來議不合因涿州事復變道經
別帳其帥聞洪尚書名爭邀入穹廬出女伎番舞舉渾
脫酒以勸到燕一月越王烏珠族烏珠黨與坐死數百
千人獨先君故與持論身幾死數矣烏舍知之故得免
燕人重先君執節爭持酒食相勞苦先君間行屢市物

色謀者得趙德書機事數萬言藏故絮中以歸曰順昌之役敵震懼喪魄燕之珍器重寶悉徙以北意欲捐燕以南棄之王師亟還自失機會雖再躡河南後必更成具以烏舍問荅語并兩宮諸王主所居報上是歲紹興十年也明年夏求得皇太后書遣邵武男子李微來上大喜因御經筵謂講讀官曰不知太母寧否幾二十年雖遣使百輩不如此一書遂官李微其冬復以書曰敵已厭兵勢不能久異時以婦隨軍今不敢攜朝廷不知

虛實卑辭厚幣未有成約不若乘勝進擊再造猶反掌
爾所取投附人民欲保守江南歸之可也獨不監侯景
之禍乎若欲復故疆報世讎不宜與胡銓封事此或有
之知中國有人益生懼心張丞相名動殊方可惜置之
散地并問李趙二相安否獻六朝御容徽宗御書其後
和定祐陵太后歸音皆先報凡四年中以文書至者九
數陳軍國利疾謂施行之則宗社生靈之福留中皆莫
得聞先君言無隱情歸國以此觸罪諸子懼深禍過庭

不敢一問北事故忠謀秘策不詳得獨係帛書所存大略如此嘗有旨以先君母老賜錢百萬又與將仕郎恩澤五人它賜予者三參知政事万俟卨公出疆上知先君急闕命其副特持賜金帛十二年二月适遵濫登博學宏詞科宰臣以所試制詞進讀上顧姓名問曰是洪某子耶父在遠能自立此忠義報也可與陞擢差遣故遵除祕書正字适為刪定勅令官繼亦改秩入館自博學宏詞改科即除館閣自遵始次月宰輔賀皇太后有來

期上曰洪某身陷敵區乃心王室忠孝之節久而不渝誠
可嘉尚某之二子並中詞科亦其忠孝之報也士大夫苟
能崇尚節義天必祐之先聖福善惡淫之訓於某可以見
矣語在慈寧宮迴鑾事實初宇文虛中既換金官欲扳先
君分譴乃力薦於金庭換先君為翰林直學士力辭獲免
虛中為詳定禮儀使始造赦其文復及換授先君訴金相
韓昉乞於真定或大名養濟圖逃歸計昉怒虛中贊其決
遂換中京副留守復力辭昉大怒降留司判官為承德郎

趣行者屢矣誓以死不就職金法雖未換官曾被任使者
永不可歸遂欲以計墮先君令校雲中進士試使者監上
道先君月損食陽為有疾狀既至謂院官曰今取士以詩
賦吾故學經耳曰豈不能出語策士乎考官孫九鼎者有
大學舊為以疾聞得回燕金議遣奉使人各還其鄉因赦
及之它使者幸稍徙多占淮北無敢言淮以南先君實以
饒州聞張公邵朱公弁亦自言和州徽州人既議和還淮
以南使者故先君三人在遣中用事者多曰此等人若放

了幾時更有今不留後必為我患歸計屢欲變叅知政事
王公使至燕先君得金陰謀從坡上與館中人語為留守
易王所獲對吏將馳流星騎上其事副留守渤海人高吉
祥素嘉先君忠委曲護出之且易以它牘先君行月餘方
以元牘奏垂入境追者七騎至及諸淮則在舟中矣至盱
台以奉使無狀自劾上方以來歸為喜報無罪可待日
以御札趣覲既至闕登時見內殿奏事罷力求鄉郡養
老母上曰卿忠貫日月志不忘君雖蘇武不能過豈可

捨朕去也賜內庫金帶鞍馬既又以馬驚復拜賜又賜御銘盾制琴一黃金參百兩帛五百疋象齒三百斤縣香酒茶諸果物中使日踵門咨訪宸章沓至且諭旨將柄用皇太后之歸也過燕先君冒禁朝焉至陞對乞賜見明日即召之慈寧殿已設簾皇太后顧帝人吾故識尚書矣命徹之問勞優渥語必稱尚書賚予係道東朝對外庭臣唯先君一人見宰相秦檜肆言無所避彌三日不休曰張丞相敵所尊憚乃不得用錢塘暫蹕而景

靈太廟極土木之工示無中原耶語侵秦皆類此秦謂
适曰尊公信有忠節得上眷但官職如讀書速則易終
而無味要當如黃鐘大呂乃可閱九日進徽猷閣直學
士提舉萬壽觀兼權直學士院金來取趙彬輩三十家
先君疏言昔晉韓起謁環於鄭鄭小國也能引誼不與
金既限淮臣官屬皆吳人留不遣蓋慮知其虛實情偽
也彼方困於他國姑示強以脅中國若遽從之彼將謂
秦無人而輕我矣後三日復上疏言或以不與之故致

逾盟且曰俟淵聖皇帝及皇族歸乃遣又言王倫郭元邁輩以身徇國棄之不取緩急何以使人辭益愷切經筵進故實引楚平王止子旗伐吳事因言吳取州來楚弗與校撫民治國五年而後用師今淮右之民勞罷流散宜時使薄斂勿令轉徙無告中興急務也秦益不喜初金圍楚州久不下時秦留尼堪所乃使之草檄諭降有室撫者在軍知狀先君與秦語及金事因曰憶錫納否別時託寄聲秦色變而罷明日侍御史李文會論先

君在朝必生事遂出知饒州時太碩人春秋八十有五
晝錦鄰下學士大夫榮之明年大水秦方鉗天下舌不
得言中官曰鶚從皇太后北歸者宣告變理乖盭洪尚
書名聞中外顧不用秦間繫鶚大理獄成鶚實不識先
君特以在金知名故鶚既流嶺海諫議大夫詹大方指
先君與鶚刎頸交更相稱譽遂提舉江州太平觀未幾
丁太碩人憂先君恨牽久使事承顏闕養空囊中辦大
葬一椽一石心營指授終日挾杖與工傭等勞而御史

中丞何若猶論先君為睥睨鈞衡謀不靖者服除復得
太平觀州通判李勤與太守王公洋同僚陳公之淵積
不相能且幸以訐進誣先君作欺世飛語王陳與聞之
有雅憎先君者從中實其事殿中侍御史余堯弼以為
言王陳罷去先君責濠州團練副使安置英州既至得
僧舍數楹於黃茆叢竹中居之泊如地產奇石遣僮嬴
糧幽討羅列四壁下手斧鑿晝連夕丁東其間閩人倪
啓老矣以承務郎守郡自謂秩卑無與主聞新興守以

巧中遷客取使節意躍然效之鈞先君為奇貨使主兵
官左右狙罅隙捕鍛家奴獄中欲持一兩事釀成罪以
梯已未及發營死其後徙居城北山中仍年谿漲通衢
沒其棟先君容郡人避水扶襁老稚填溢堂廡幾千指
皆廩食之數日水退然後去先君半世朔庭入翰林不
旬浹還鄉三秋執喪之日過半屏徙厲土嵐毒侵淫訖
無珍膳良藥自輔二年而瘴作蓋不食十有八日惛不
知人嘗少寤口占秀州抹菑事授諸子呼天請命夜夢

之帝所有宣赤章云云者詰朝即能食至于復初後二年乃卧末疾謫九歲始復左朝奉郎主台州崇道觀居袁州未逾領疾革以二十五年十月二十日薨于南雄後一日秦亡訃至輔臣入奏上嗟惜久之即復敷文閣直學士制曰有功見知聖人醲於用賞不幸而過君子為之動心矧予嚴近之臣備載忠勤之績眷倚方渥愛憎隨生坐一眚以投荒積九年而不徙人無言者朕甚念之洪某學有本源氣存剛大惟知忠力以衛上不顧

險夷之在前御君命以徂征厄海濱而不悔誠貫白日
聲震朔方義重於生耿恭無王門之望天將悔禍蘇武
持漢節而歸大節無虧多言不宥遂解禁林之直卒遷
瘴嶺之南閱歲滋深餘齡可憫宜畀真祠之逸仍增延
閣之華尚對寵光歸安鄉社自聖上躬萬幾還逐臣非
罪者先君適以不起聞而聖意哀厚首得舊物使及其
生存而寵之故訓詞惻怛如此遺奏未至特詔贈四官
推遺致恩別以一孫官江東漕司庀喪事先君少英儻

有奇節以諸生待廷試京師伯父給事位南床王黼為
中執法慕先君為人欲妻以女弟給事以同臺故曲為
平章先君懇拜曰婦所以事舅姑也家素壁立今暴得
一官乃令鼎貴薦女身得計矣如父母何暨擢第朱勔
復請昏資送萬計且啗以顯仕拒尤力朱不獲命鬻榜
中周審言壻之及周直內閣服金帶為秀州守先君迺
在幙下人為先君惜之視之蔑如也使金得修職郎四
人時有六子獨适預名三以官弟姪且乞以一弟晬奉

甘旨曄起布衣奪哀為秀州判官凡弟姪及姊妹之家
以先君入官者七人庶弟孤姪雖多力為謀昏對前後
賜物班內外之親無餘贏不為問舍求田計寔窳即功
始假貸有一壘未及獲而貶已貶猶歲割粟以贍親之
貧者至自奉惡衣糲食不擇初撫諭京淮降空名告身
二十通以便賞功存其半或求竄名卻弗應封以還
尚書懿節皇后之姨高氏與其夫趙伯璘隸烏舍戲下
貧甚先君屢賙之范蜀公之孫祖平金不以為官傭奴

之先君使以東坡所為蜀公銘白曰我官人也金曰東坡書之不疑矣即釋之先君資以歸裝貴族有流於黃龍府優籍者二人先君囑副留守趙倫除其籍劉公光世之庶女小醜在金豢豕為贖以重價求匹偶衣冠之家略為人奴者贖之數十人張待制字發自蔚州死雲中先君過荒寺見其櫬攜之至燕山授其僕鍾禹功使葬司馬侍郎朴握節以死居數年無有能明之者先君為陳本末詔以忠節顯著贈兵部尚書其歸也北人治

餞具幾月後使者至金多問先君今何官居何地先君
天性强記書無所不讀雖食不釋卷稗官小說亦暗誦
連數千言宣政間春秋之學絕先君獨窮遺經貫穿三
傳在冷山摘褒貶微旨作詩千篇北人抄傳誦習欲刻
板於燕先君弗之許於姓氏尤精官制部日使者胡公
直孺嘗問祖之所自出先君曰姓書以胡為陳胡公之
後陳媯姓也若以諡為氏齊亦有胡公豈獨陳乎蓋胡
自有兩祖春秋有胡國嘗以女聘魯襄公經書夫人歸

氏薨則胡以國氏歸其姓也今為安定胡氏晉胡奮其後也魏孝文入洛改功臣複姓以紇骨氏為胡今所為河南胡氏者是也同列董公將戲曰董亦有兩祖耶曰昔颺叔安之裔子董父善擾龍帝舜賜姓曰董封諸驩川驩夷氏其後也又辛有之二子董督晉典晉於是有董史因為董氏董狐其後也二公歎服善琴奕好古能別三代彝器見書畫不計直必得之乃已有書萬餘卷名畫數百卷皆厄兵燼居窮絕域復訪求裊載以歸四

裔附錄所載西瓜先君持以獻故禁園及鄉圃種之皆
碩大西瓜始入中國有文集十卷春秋紀詠三十卷輶
軒唱和集三卷帝王通要五卷姓氏指南十卷松漠記
聞二卷金國文具錄一卷先君剛直言不誠不發雖與
人尺牘無一字過譽有膽略遇大事敢為平居慷慨有
經略四方之志常語諸子曰在北方久料之熟矣今其
勢日削可以憑軾取之過河朔時見父老指其子孫云
是皆生長兵間已二十餘矣不知有宋我輩老且死恐

無以係思趙心不幸大忤時相挫抑顛沛天不假齡齋
志沒地諸孤不孝不及見其成大功名也蒼天蒼天安
所聲痛先君自為從官不報考功課故官止朝散郎以
贈至大夫職至徽猷閣直學士爵至鄱陽郡開國侯食
邑至一千一百戶壽至六十八娶沈氏左大中大夫復
之女封碩人初先君眷戀庭闈不忍去太碩人以移孝
顯親諄諄勉之且曰婦孝足以寧起居切毋以我老關
念既越疆金兵益南牧音郵絕不相及太碩人倚門積

憂幾罷寢食碩人左右娛侍極意順適致太碩人康寧
及見先君之歸其擇師教諸子則不遠千里拊妾侍盡
恩紀愛其出隆於已生叔妹娣姒細麤柔剛不同一切
得其歡心中外語婦德之最必以為法即世五年先君
始還以不見為戚故終不忍復娶洪氏始居樂平之金
山自曾祖府君種德重義以氣節聞子中大夫蚤世二
孫幼府君慨然思所以成立計即挈諸城中訪先生之
賢力教之因占籍鄱陽長孫諱彥昇起家遂給事中大

夫雖不遇至先君益顯八男子适左奉議郎主管台州
崇道觀簿左朝奉郎秘書省正字兼權中書舍人邁左
宣教郎通判袁州逖右宣義郎徽州婺源縣丞遜右承
務郎僉書連州判官事邈右承奉郎江西安撫司准備
差使邃迅未仕四女子嫁左從政郎池州建德縣令余
執度右迪功郎潭州湘陰縣主簿王馭將仕郎臧棟一
尚幼孫男十一人覲右迪功郎江東轉運司准備差遣
秘脩樞桮桴楹櫟棹櫓柁女九人初先君既得合葬於

溺潭去五里所其鄉曰和風南管得故縣之原瞻愛其
山川呼畚鍤畫墓位曰吾百歲後必於斯從二親不遠
矣薨之明年孤适等慟哭行所卜問叢辰五行家曰十
一月丙申吉將以其日藏事恐死紀實求立言君子大
書且以備太史氏采擇云紹興二十六年二月二日孤
某等泣血書

盤洲文集卷七十四



總校官進士臣胡 榮

校對官編修臣周厚轅

謄錄監生臣徐掄元

謄錄監生臣李維翰

欽定四庫全書薈要

集部

盤洲文集卷七十

五至
七

詳校官助教臣謝登雋



欽定四庫全書薈要卷一萬五千八百二十五

集部

盤洲文集卷七十五

宋 洪适 撰

墓誌五

韓承議墓誌銘

韓氏自忠憲公以進士起家仁宗朝參大政其稱甚

崇贈太師諱億有子八人達者半曰知制誥諱綜曰司空東國公諡獻肅諱絳曰門下侍郎諱維曰司空崇國公諡莊敏諱縝襲貂駢簪天下尊至莊敏生大中大夫

贈正議大夫諱宗武正議生奉直大夫通判洺州贈朝
議大夫諱璆是為君之考君諱黥字少汲其先蓋真定
人自忠憲居京師遂著籍君藉蔭入官調萍鄉尉禽盜
滿品遷右承奉郎僉書連州判官廳事改廣西轉運司
主管文字通判廉州肇慶府德慶闕守遂攝府事又攝
南恩州六遷至右承議郎紹興二十三年正月戊戌卒
年四十九妣榮氏曾氏皆贈恭人娶李氏大理寺丞處
廉之女封孺人二子長元鼎次元龜元龜先亡君性精

敏遇盤錯自喜以興利去害為己任見居官選悞者與民之所戚若疣贅在體必欲抉去之猾惡吏脅息不敢為非然根於忠厚嚴而不刻在桂辦職有聲一時上官多聞人爭令出其門下在廉關決得其平德慶守貳文惡事廢不振君至剔磔一新初公量踰制一耗三吏復並緣乾沒典負者肆其擾君毀量息弊檢覈常賦無所漏失遂罷貢金之斂賸折租之直仁枯鋤彊公私盈足瀧水阯氏淵藪流逋奪民田鹵子女設牢檻淫毒一方

莫敢牾君捕置于理百姓件其治行勾諸臺聞之俾即
真時連帥方公雅材君相與推挽請于朝報未下至南
恩不數月而死方公既遣君之猶子護柩念其子少而
故鄉未能歸也則為買地于廣之番禺縣王置原凡宅
窆之事具為區處以其年四月庚申葬之復具石碑文
而納諸壙使其孤異時瞻拱木議歸葬有考焉銘曰

韓胄諸姬顯于宋之興垂祉續休代有名公卿裁犀斷蛟
君發其硯曷畀以材而晉厥齡有鬱彼阡知己所營後

人其昌視文斯銘

第三子墓銘

予佐天台郡罷有日聞家君謫英州理裝亟行時第三子病創甫痂落次嫠女內子病且棘叫七男女與之訣獨是子傷哽不自勝憩旁榻涕泗交下既少間予取捷道趨家君寓所及之豫章諸子奉其母還吾鄉閱月有執書汗而前者言吾子創之毒未蕩治隆暑登道邪熱中蘊瘡遂痢咽不粒者浹辰矣居頃之別膝下回見吾

子尪然存其骨喜吾之歸則強內糜飲匙匙必吾親授
斯須不許離去日昃則命乳保拂筌枕以俟如是者二
十日氣垂盡猶取松桃薦茗以進我忽曰我頭瘳然隙
中得無風耶芥之起絕矣吾子名摺字習之五歲齒二
兄從師即加巾不肯髣髵為小兒狀誦書酬對必欲偕
仲氏或疾病休止則咨惋以為不能及苗而不秀命也
夫其生以紹興十年九月之六日其亡以十七年八月
之六日明年某月某日葬之淵潭祔祖之塋也父鄱陽

洪某為之銘曰

婺女之泣豈將與母睽乎豫章之役豈忍死以俟吾
之歸乎孰知夫彭殤天永之齊乎則吾能無悲乎

叔父常平墓誌銘

紹興十九年八月壬戌前提舉福建常平事洪公卒得
年六十既歛猶子某日往哭退將比輯公之冑出官行
俾其孤逸求聲於文者誌之逸拜曰逸將以今之十一
月壬寅歲大事苟遠取達官聞人懼不及期敢以屬吾

兄某辭不獲乃為之文曰昔包犧氏既衰共工氏以水紀伯九域共氏其後也後世避怨為洪氏在吳有廬江太守矩在唐有集賢學士孝昌五季亂始自歛徙名數於饒之樂平又七世始家鄱陽諱某於公為曾大父生贈中大夫諱某代有芬懿董範鄒閑中大夫生公之考某至給事中終徽猷閣待制荆湖南路安撫使贈左光祿大夫政和中給事公歷三院御史拜瑣闥立朝八年公入國子學磨礱涵浸校官第文屢占異等以蔭授承

務郎監在京草場淮寧府工曹以給事憂去沒喪監洪
州苗倉江寧府司錄京東制置司幹辦公事通判密州
劇賊丁一箭王大刀衆數十萬掀郡邑圍城七日矢石
旁午樓櫓摧塌公登陴勵衆矢著右股無懾容乃造氊
笆木架為蔽扞守者賴之夜遣壯士火營毀其攻具賊
不酬欲而去密人德公歲時烝嘗之入通判江州未行
丁張夫人憂沒喪主管江州太平觀台州崇道觀四滿
秩又通判鄂州未行擢提舉兩浙市舶賜五品衣魚遷

提舉福建常平茶事福州民張圓覺自言遇鍾離先生授以五花杖因鬻髮從浮圖教頗能談人往來證甌粵機鬼媚佛一咻千煽閼然神之謂之張聖者扶攜羣稚丐庇澡雪至暘殆道上無退心嘗欲作建州大中寺齊民罄委貲積日薦百萬惡少年扳名伍中潛有不逞謀它在位者猶豫福禍茹不敢宣公斧其杖迎刃而碎惑者始靖遂以狀聞驗治抵法攝行憲事半歲多所平反公自少棲心禪宗在建康日從南遁銓公遊嘗夏行縣

黎明陟山日初吐輿人呼蓋聲受虛谷豁然有得遂稱
一了居士板輿養缺即坦坦無宦游意庵居窮山蒲茵
楮帳而已嘗識于壁曰山居不問人間事飽飯支筇看
補籬不治官簿十有四年朝廷休之起貳武昌先葬元
配於城東懷德鄉之上福里公自為壽藏閩川代還乃
簡材市甃欲營道院於墓側曰軒裳非我嗜也將晦遠
人事倘羊餘景不幸遇疾既亟家人欲禱釋老氏公曰
死生夜旦爾何禱為將易簣召薦福道行師與語世間

法寄祿七遷至承議郎既納祿轉右朝奉郎公諱昕字
光佐母張氏永嘉郡太夫人三娶皆王氏前孺人真定
府路安撫使贈少師本之女通書能文尤尚竺典盛年
去粉黛之飾自號寂照道人次孺人提點江西刑獄汝
舟之孫亦先公沒今孺人其娣也男右從政郎鑄錢司
檢踏官逸五女長居室次適左迪功郎建州州學教授
李綺餘尚幼孫男三楮櫟女四公色溫氣平喜愠不
形於顏口無譎言接貴賤尊卑如一聞人一長不啻已

有在閩部中官屬有獲譴其長者必曲為營護凡居官
不為驚人耳目事以壓衆牽譽去咸思之為銘曰

仕不及汲西都之揚丁年聞道襄陽之龐晚還其時弗高厥
飛人以拙歸一笑領之天不祉公公則無憾琢辭于石
式款其坎

趙孺人墓誌銘

有宋賢宗室女出自永熙陵蓋漢之六世孫湖南部使
者士鵬之第五女年十有八為我伯父桂林郡通守番

陽洪公諱昭之冢婦江西部使者屬諱壽卿之繼室有淑行馴德詣于上下人不見其愠容予羣從兄弟三十人君為丘嫂合貴賤指三千譽之一口姻表州里間者皆賢之凡十三年而寡人以君華年妍狀必不久於洪氏既三年湖南公守臨川遣其弟迎之車乘鮮明甚都既至綺寮廣廈絲竹攢耳頤指如意方擇賢士為匹偶君誓而弗許曰姑老矣二子童騃不敢以累老者父母百方不能奪俄懇請而歸入門欣然不以見紛華而改

其操桂林公沒世久王夫人齊家井井有條序而質橐

不豐江西君無同父弟闡以內惟婦姑數穉人其寂寥

不可一朝居而君泰如也時節宗戚相問遺君不少闕

斤簪珥囊衣自辦不以告其上或遺之鮮衣必獻諸姑

有副而后敢服姑疾煮藥進膳不懈夕則侍寢有間而

后敢退掃一室夙興誦旁行書已則閱稗官說有他出

二子誨其箴縷之事常在側家塾晚休必使誦書于前

其遣閑謹獨之術如此與諸姒不啻若同產以斯須不

見面為懷遲明女奴絡繹訊興寢狀既盥接踵省問移
晷不忍散否則爭相迎致趣之者袂相屬步搖所向和
氣隨之東往則西怨曰奚為後我無少長剛柔咸慕而
歸象之女嫁矣其節益堅紹興二十八年七月己巳食
於姑前失七筯而瞑年三十有八尊卑內外哭之過乎
哀孀其息也櫛其庶也右承務郎汪德輅其倩也次年
十一月甲申封于郭外土湖之陰其皇辟之宮也昔魯
襄公三十年宋災火至伯姬之宮左右請避之伯姬以

不見保傅之姆夜不下堂遂死于火孔子賢而閔之其
卒其葬已見於春秋又書其諡又書其送葬之卿蓋汝
墳漢廣之風日衰鮮克以禮自防況於諸侯之女乎今
巨室名門華衣螳食圖史不關其心悍妬奢淫者多矣
況於天子之裔乎此而不銘孰可以銘銘曰
怨耦偕老冶容壽考緘恨重泉嗚呼天道

鄭宜人墓誌銘

有素冠踵門遙望文書銜袖謁入則孫君某老也升自

賓階予數席肅之坐作而曰某老不孝之罪上通于天
每生衰經中不可復名為人昔者母氏常曰吾與汝兩
家大父俱以儒學射科帥節州符丕受光渥汝必強學
趾美母作前人羞某老年益長業益不成以墜我母訓
既調建昌司理叅軍母氏則曰彼染珥筆之俗多推埋
姦典獄之責重汝狹中不善媚上官弗戒且賈禍某老
又墜母訓不能書紳三省考滿未得代遭誣成獄以囚
服往母氏方枕疾聞之寢劇某老碎心齧舌懼不一見

慈顏即日取爰書自誣而母氏終不能起鉅創沈痛不
若速化跼蹐天壤何以贖莫大之釁獨求文納壙使壺
範振白於後庶幾少塞凱風寒泉之思復念曾大父大
中公繇臨朐徙江陵有田荆門而少師公墳墓在焉吾
父客番陽十五寒暑與公里門相望今陸走二千里泣
血護櫬歸窆大父之塋之側復在公封內敢以銘為請
予既際孫氏父子於吾鄉又將假守其鄉無說以辭乃
受其狀而敘之曰宜人鄭氏嚴之建德人左朝請大夫

知宿州諱弇之孫江陵丞諱續之子左中大夫徽猷閣
待制鄜延路經略安撫使贈少師諱琦之婦右朝請大
夫知汀州祖善之妻四男長某老以建昌故貶秩一等
為右從事郎次彭老右迪功郎監南嶽廟先卒次亨老
將仕郎次永老二女子長嫁進士李良翰次未笄孫男
二人女一人凡為孫氏婦四十有五年從夫爵三受封
自孺人為宜人以紹興二十七年四月十六日終其壽
六十次年十一月甲申葬于荆門之長林縣曰楊鄉柘

子步初宿州以女女少師有賢行是為越國夫人孫氏
嘉夫人之德欲締好於鄭越國迺擇其姪以室其子宜
人在家警慧柔靚不流侈習喜圖史箴戒之書既嫁不
以世姻而簡尊卑之禮謹持婦道不見缺虧省問燠寒
抑搔苛癢退則臨滌澣薑桂之事宗族稱焉靖康之難
汀州官于汾寇至將閉關宜人曰老姑隔遠必子孫為
憂事急矣毋恃俱死君守職不可出我則攜孥去之遂
蒙犯豺虎崎嶇走家越國相持以泣倚門之念猶不替

宜人委曲寬曉居亡何汾州更盡還當是時微宜人老者幾不能生盜亘江漢盡室順流而下旅食三郡伏臘不腆宜人衣麤食惡不槩懷及汀州三仕半刺史家道少振宜人益恭儉服飾不事鮮好持不殺戒食無貳味信釋家者之說旦旦取其書誦之訓子弄孫仁浹婢御無毫髮冒疾心汀州老於官途多內助也予間宜人甚愛厥子而建昌亦孝世無鍾離公弗使脫幽圉以憑斂其肯惻然於陸氏一杯羹乎哀哉乃為之銘曰

孰饑其子使母戚以死闕地其從姑茲惟受祉

盤洲文集卷七十五